

## **CV Sara-Bigna Janett** rumauntsch

Sara-Bigna Janett es creschida sü in Engiadin'Ota, ma sias ragischs musicalas ho'la a Tschlin. Cun ses ans nun ho sieu bap pü pudieu frener sieu giavüsch dad imprendder a chanter ed ho finelmaing cumanzo a guider ad ella ed a sia vusch. Daspö lo ho ella cun grand optimissem e cun bger svung e vögliä (e minchataunt eir main svung e vögliä) perseguito la via da chantadura.

Il pü important in sieu chaunt es per Sara-Bigna cha la musicalited nu ceda a la perfecziun. Ella es adüna in tschercha da la dretta balauntscha traunter esser i'l mumaint e fuormer il tun cun absoluta precisiun.

Ella do ün'expressiun ed ün cling persunel a bgers differents geners da musica e creescha uschè ün'interpretaziun autentica.

La chanzun rumauntscha, saja que populera u chanzun d'art, accompagna a Sara-Bigna daspö sia naschentscha. Sia chüra e cuntinuaziun la staun fich a cour. La lingua rumauntscha e'l chaunt fuorman üna perfetta simbiosa musicala. Que resta be da sperer cha'l rumauntsch nu vo a verlüüra.